

十住斷結經卷第五

第六同卷

談四

姚秦沙門世佛念譯

菩薩成道品第十

是時最勝菩薩復白佛言世尊云何十住菩薩於十地中而淨其行是時世尊告最勝曰

談四

所謂菩薩修神妙道廣度衆生以性空法暢演文字進修禁戒其德無量不可思議亦無有限一切世人所不能及天龍鬼神及神尊者無能齊限稱歎其德賢聖默然初無所說若有所演悉成章句示現神足到十方國面觀禮敬諸佛世尊復入定意解脫正受周普恒沙諸佛國土見諸正覺聞奇要異皆悉過度邪部之業志若安明亦不傾動心如虛空無所想念分別曉了法界起滅其所說法皆應聖印遊諸正受初無差違十方諸佛所說

言教與聖法律不相違背所出音聲微妙殊絕觀諸世界等若虛空意念充滿解脫之門補處菩薩辯才通達義應識機心與道慧而共相應何謂為心何謂道慧周流世典現入邪業是謂為心專精一意在度世法是謂道慧捨慳布施使無想報調意和順審諦安詳是謂為心正入寂寞不與諸想憺怕自守不離聖典是謂道慧若在生死務修其法雖處其中亦不厭惡是菩薩心若復菩薩在八難中不閑之處不起顛倒有二見心悉能度於終始之病是謂道慧於世俗法嗟歎泥洹無為之道所造功德終不唐捐是謂為心菩薩遊於諸法之空達了清淨而無所有是謂道慧觀于前人隨其本意而為分別所應之法是謂為心菩薩入定觀一法慧同于百千諸

法之相是謂道慧決意惠施不惜所有國財
妻子無所愛恪是謂為心處在平等無三乘
道淨于道場盡歸佛道是謂道慧是謂十住
菩薩大士道心所入靡不周備守護身口不
令放逸歎譽具足八大人念當念少欲知足
之行奉修禁戒而無點汙能為衆生淨於塵
垢若見衆生每自歎已毀辱他人自大貢高
憍慢豪貴懷姪怒癡不善之法如斯之類便
能與說忍辱之德皆使衆生隨時自致無所
從生法忍於中立勤愍諸困厄不及道者意
猛精進心不退轉分別一切德本之業不見
集聚共合偶者復不見散有若干別所興福
業而無所住非不有住悉與相應而無所應
不見有應不見無應無應不應是謂審諦心
常娛樂禪思脫門思惟四食除去染著觀察

盡滅不起定意所聞強記輒能誦慧無所
亂分別根源無有處所欲尋其本亦不可得
為衆生宣三十七品解空無相無願之法常
能奉持崇于佛道隨諸報應令得道果諸佛
世尊所可宣說亦無若干所因興出斯是真
諦乃至滅度亦復如是無有他想雜念之心
是謂最勝十住菩薩善權方便無所蔽礙以
無礙道修于等覺而為衆生轉其法輪令不
退轉堅固之地十住菩薩立堅固誓誓度衆
生而無有難譬如工巧造印章人知人姓字
便為刻記隨類記識亦不錯誤菩薩大士亦
復如是以賢聖印而印生死隨器成辦終不
謬悞復常審諦思惟此議印非泥本泥非印
原然能示現名號姓字菩薩聖慧亦復如是
執慧寶印印可衆生隨器布現使成名號便

能出生三乘道教如於良田種子穀子莖節
萌芽展轉成長穀敗芽生無復本體深自思
惟芽非本子亦不離本菩薩大士亦復如是
因緣合會乃應法律觀諸衆生所有瑕穢三
患六礙十二因緣邪疑身見顛倒之想便爲
演說苦空非身無常之法然後乃說如爾法
性分別苦諦集盡道諦離於重擔永獲寂滅
復當思惟原究本末因其所生乃有斯患悉
由無明無慧法致于老病死苦惱我當
方便煎消其疾漸漸令入賢聖法律以滅無
明生老病死永無有餘講演空觀寂然之法
皆使有歸令得恃怙廣其慧明至於解脫悉
共崇習微妙之智了姪怒癡等無差特尋其
源本亦不可別以獲消滅衆想之念終不懷
恨生增滅心得離一切諸種陰蓋縛著結使

無復罣礙心常遊於解脫之門嗟歎三寶功
德之業常念遠離貪欲之患堪爲衆生宣布
功勳菩薩精進於彼無疑示現空慧而開導
之凡所學法盡無所著以次成就於不退轉
頒宣經道淨修佛土招引衆生來入佛境令
得滅度永無起滅是謂菩薩無上衆祐要典
如是菩薩當作是觀十住所入不可思議修
于平等不二入門達於三世不斷三寶除去
三垢成三脫門菩薩於彼示不思議從初發
意至于十住常歎開士所修禁戒德香之熏
靡不周遍彈指之頃皆悉了達音響之義於
諸通慧而得成就悉能講演無量法要於諸
文字解無所著亦無識想尋其處所了無窠
窟若有學人繫識在色心不違之常懷希望
縛著不捨遊於生死周旋往來意常迷荒不

能自拔有此疑網則墜生死輪轉五道無復
休息菩薩執正御諸亂想不為五陰之所流
馳斷諸陰蓋亦不使色痛想行識令有起滅
思惟安般出入息念復當分別四大造色地
水火風各各有性若使彼識不在五處便能
成就不壞法界識不流馳十二塵勞眼色耳
聲鼻香舌味身更意法是謂無漏慧根之識
非為生死染汙之識若能消滅外不馳騁於
一切法則無希望設有所倚便生識想有所
僥倖亦名為識菩薩起學無所受入心不生
念無所慕樂所施功勞不望其報有為有漏
斯為識種修無為行乃謂無識菩薩闡揚慧
明之燈豎無為炬放大光明顯示殊勝無等
之教為求質直不求校飾住於道業其身自
然無能及者能顯一切諸佛國土於中示現

獨步無畏復於諸法永無所獲亦不選擇見
有高下心應自在不懷怯弱隨其音響而教
化之若為眾生說深法要捨離一切所與因
緣悉了眾生心之所念志性所趣善惡之法
皆能周普諸佛國土諸佛世尊所修平等不
見眾生佛國清淨若見有行則毀法界是故
菩薩心無所住若觀眾生住于起分則於法
性自生識累不起不滅識無所住是謂清淨
無為道慧設無道慧平等之法諸佛世尊終
不愍哀與出於世菩薩弘誓行業無本亦不
住本達於自然不有精勤有所成辦不見疲
厭有懈怠者於平等觀無生無滅勇猛精進
受菩薩剎悉能分別經典本末採取智慧除
去塵勞觀察生死及與滅度不以為異恒自
懷抱深經之義探採遠近寂然無迹雖度眾

生亦無想識親善知識心無所著不計吾我
及與壽命分別思惟空無相願不起不滅若
在欲界思惟欲愛穢臭不淨色無色界受形
之處達知不淨因欲開化迷惑之徒故為說
此真諦之義分別空無悉無處所不見造作
有形質者無作不作不見依倚住無所住亦
無根本亦復不見受三惡趣不見生天食封
自然顯示徑路使入道義無所希望悉無所
行於諸法觀自致自然諸法之想不可究竟
亦如虛空而無邊際十住菩薩教人惠施不
興想礙持戒忍辱精進一心宣暢智慧善權
方便慈悲喜捨救攝貧賤建立大道十住菩
薩雖未昇于如來正座以能究暢慧海之源
莊嚴土地修清淨國放大光明普致衆生訓
以正法悉歸於道建立慧業而獲大乘十方

諸佛恒將護之常以威神助揚其德乃至作
佛成一切智為無上道不使魔衆而得其便
十住菩薩以自覺知功德具滿欲成作佛坐
樹王下先當修行習四意止分別身意各各
有性便自觀身起滅與衰心自慶賀永離苦
惱觀身因緣成精進定思惟此身報應之對
因緣合成散則磨滅知身無主亦不可貪何
為任意著此色身莫隨五陰四大諸入之所
迷惑是身為空不見四大吾我之法累劫積
行今始乃得何為著此無堅固身危脆之物
我今當受如來色身及佛法身夫色身者功
德之聚猶如金剛不可沮壞十方世界恒沙
之數滿中世俗有漏之身不及如來色身一
毛之德菩薩自念以無量德成此色身今因
此形當受如來佛法之身雖涉生死往返五

道受苦無量不可稱限今受如來色身之體不念曩日更苦惱患自今永與諸塵勞別不復貪著五欲之中觀己身已觀他人身悉無處所修其淨行而無瑕穢是謂菩薩修習已身意止之法云何菩薩復當思惟痛意止之法於是菩薩從初發意至于成佛於其中間所更苦痛不可限量專心建志慕求佛道不以苦痛經歷心懷若見苦人趣惡處者便能拔濟使不受苦恒念眾生不能自悟終不隨欲而興繫著我昔以來所更痛痒非真非有悉無所生若使遭遇不苦不樂痛此名無記不可字名夫人習近著樂痛者便自遠離如來之座不應如來賢聖戒律自今永息不復生痛使諸眾生觀痛無主若彼眾生於色起痛若好若醜善色惡色地水火風四大造色

達知虛寂而無所有或有眾生先痛後樂或有先樂後痛當說深經使護痛痒耳鼻口身意所興色聲香味細滑之法從因緣起從因緣滅思惟苦樂悉無苦樂復當分別內外之痛或有樂痛於現在生或以過去或將來世而有生者或有樂痛從愛結生轉增識著不能捨離或有樂痛從癡愛生思惟止觀乃得消滅或有樂痛因邪疑生轉轉滋長以四非常深遠之慧除使不生或有樂痛從四受生以無想定而除諸受或有樂痛從五蓋生便當思惟七覺意法永使無餘或有樂痛因六身法生分別於空無相無願或有樂痛從七識生常建精進不造彼緣或有樂痛因世八法生常當下意不自貢高或有樂痛從九惱生當自勗勉永離九處或有樂痛從十患

生當除望求不念橫買或有樂痛從七淵四使生便當思惟智慧大明或有樂痛從九衆生居及三觀生便當執意入空寂定或有樂痛非過去現在因未來愛非未來現在因過去愛非過去未來因現在愛或非過去因未來現在愛或非未來因過去現在愛或非現在因未來過去愛菩薩於彼思惟七處三觀之法滅此十三隆熾之毒於是菩薩復當思惟樂痛所興或有樂痛由八邪見及六識身共相受入便生樂痛遂增陰衰諸入之種是謂菩薩以解脫觀分別此痛永使無餘或有樂痛與十不善穢陋之法共相因緣慧業所斷五疑羅網於現在生即現在滅若未來生亦現在滅若過去生亦現在滅是謂菩薩以解脫觀便能除却十五疑網云何菩薩復當

思惟意止之法於是菩薩執意御亂心不流馳有所造作必有所緣自觀已意觀他人心其意正等不懷增減所適之方行步出入舉動安詳常自專精守護其心有緣衆生無緣起滅無緣衆生有緣起滅於已緣起自緣滅之於他緣起因他緣滅或緣起滅亦不在內復不在外亦復不在住兩中間於中出生有緣起滅有非緣起滅或因貪婬瞋恚愚癡七使七慢七識止處七解七觀七忍慧業若因此處有緣起滅有非緣起滅斯皆由心因心而生此四十五盲闇之法意識所造不自覺知意不知意誰為意本既無根本何有意哉菩薩分別心意識法通達往來而無處所是謂菩薩以解脫觀知心緣本而不可得亦不見心與善惡合無合不合應解脫觀又復思

惟十二因緣甚為深遠不可究盡所種之果不失報應於諸法界心無染著設觀法界從因緣起了知諸法無有真諦自然寂靜將養自守心所造化亦無形質而不可見尋其相貌亦無色像聖慧通達便入不起無所生法不住聲聞緣覺之地常自執意遊諸佛法內自思惟踊躍無量吾今乃得降伏於心捨生死著入智慧海斯由其心得獲無上正真之道成最正覺是謂菩薩於意止法而得自在云何菩薩於法意止而分別觀於是菩薩修習正法初不忘失至成佛道亦不放捨內自觀法外觀人法菩薩悉知諸法之相一而不一亦不若干皆歸於空無相無願遠離邪見平等諸法分別十二緣起之本常念法界成敗興衰有漏無漏有為無為善法惡法有記

無記是時菩薩思惟觀察不隨法界自生識想不見非法而有吾我亦不與念計人壽命或有菩薩自興法想習著吾我養育其命思惟斷滅無常謂有常天下物類皆悉常在於無常中計無合散或於法中生顛倒想無自常無有自常有無不生有有不生無無自然生無自然滅有自然生有自然滅無不能見我自然有有不能見我自然無十住菩薩明慧達觀分別有無斷滅計常我人壽命平等空無而無所有最妙第一空觀察之第一性空亦不生有有自常有不知無之所無無自常無不知有之所有菩薩思惟以慧分別有性自空無亦自空無不造有有不造無著有無者是生死法非最第一泥洹之要無自無空無不知無無自性空有自有空有不知有

有自性空有則是無無則是是有是謂菩薩於諸法性一一分別思惟計校是常非常生滅著斷有為無為有漏無漏善法惡法有記無記一切諸法有名號者無名號者皆悉虛寂亦無起滅而自觀法觀他人法於諸想著亦無思想解空無相無願之法於法界中惟求佛法及與禁戒悉無處所亦無徑路不見度人逮解脫者亦復不見沒在生死於中開導一切衆生便能興起無蓋大哀療諸塵勞了諸纏結空無所有分別五趣訓以平等雖處塵欲不懷怯弱曉了三毒無所罣礙逮此處者名曰大士住不思議權現之道苦集盡道普歸自然於自然中不見起滅建意如空而無所有不念住處推求法界及虛空界衆生處所悉無所住一切諸法等若空界是謂菩

薩隨時將導第四順於道法十一雖度衆生亦不見度若有菩薩自觀身法觀他人法能自制意遊於智慧解知諸法悉歸解脫便能將導一切衆生顯發無上正真之道使獲無為自然之法不見所生亦不生雖處不生思惟所生不捨無生無起滅法是謂菩薩於法意止而得自在佛復告最勝十住菩薩復當思惟四意斷法常念分別現在目前未興惡法制令不生已興惡者方便滅之未生善法求令生之已生善法重令增多常當修習勤行精進自攝其心使不流馳古昔以來所積功德不失威儀禮節之法所行平等以能檢心思惟正諦禍中重者三不善根墮入惡趣輪轉五道無有休息是故菩薩勤修精進便能消滅惡不善根不復重來興起亂想常自觀察不

善報應斯是穢行是非真道吾今以離非法之行習第一義而盡塵勞永除瞋恚分別十二因緣之根未有善法建立功德令生萌芽使不敗朽其心清淨亦無瑕疵不倚三界縛著諸欲離於所著永無所著常能勸率至一切智於諸深慧不有損減所以得致功德之本皆由精勤而成道果是謂菩薩於四意斷而得自在於是菩薩復當思惟分別神足菩薩雖獲神足定意臨欲成道於第十地要當習定如初所學專意入定思惟四等加愍眾生彼自稱身亦稱心意轉入一禪次入二禪復還攝意從初禪起入第三禪於中思惟專精一意從三禪起復入初禪於禪現變而現神足從一禪起入第四禪是時菩薩於四禪中便試神足以身舉心以心舉身初如芥子

轉如麻豆漸漸轉高大如胡桃註四如是勤加至三七日身心輕便無所罣礙所以菩薩重入定意而試神足依此神足化一億人立不退轉成神足定是時菩薩復自示現廣布神足而無窮極從閻浮提至第一天第二第三乃至六天諸天見已各生此心今此菩薩自現神足所演光明靡所不照我等諸天各相勸令擁護菩薩使成佛道或以天華雜香天衣被服自然甘露而供養者於中開化諸天人必志神足而有長益過去恒沙諸菩薩等修行十住而淨其行皆於此處而試神足一心觀察伺求方便能現衆變以精進力輒成就道所為自在無能違逆所欲化者到便降伏究竟根源皆使充足使獲果報魔若魔天不能傾動是時菩薩以天眼觀三千大千世

界有姪怒癡無姪怒癡有清淨行無清淨行
有定意者無定意者有亂意者無亂意者菩
薩悉知而為分別諸根所趣復以天耳聞衆
生聲悉能隨次知音響通而教化之以神足
力八定三昧見一切人志性所趣自觀源本
所從來處是為菩薩行其神足於是菩薩復
當思惟分別根力七覺意法八賢聖道信念
精進定意慧根菩薩常以玄通之智觀察衆
生頗有成就根力覺道諸神通慧是時菩薩
以他心慧觀前衆生或有具足成就信根常
習八道平等之法心懷正見不處魔界信知
生死苦痛無量復知泥洹快樂無為信有三
尊世間大明不信外道九十六徑於諸通慧
而無狐疑積功累德熾然正法於中建立直
信無難復以玄通無罣礙智觀彼衆生晝夜

勤力修精進根坐卧經行心無懈怠以獲精
進則具諸根猶如天衣周帀四方上下正等
而無差違時若有人從一面來提衣一角舉
而移之餘三角者皆悉隨從精進根者亦復
如是設有修習精進根者當知具足一切諸
法以有精進便成念根心不錯亂名曰定根
常以方便攝意守一分別善惡心若虛空是
謂慧根十住菩薩八玄通定預知衆生受胎
之相分別男女男根女根一生十生百生千
生至無數生皆能曉了而無窮極是謂菩薩
具足道門思惟諸住智辯難及當念感動十
方國土復當遊於諸佛國土示現光明有見
光者皆得蒙度復當於諸國土興立法律普
使遵奉賢聖經典亦當安利國土人民導引
法味聞無厭足常當曉了國土人民種姓成

就不別眷屬亦當觀知衆生心意便爲演說
六度無極復當禁制衆生亂念漸漸延致一
切衆生自爲導首牽引衆生入善法慧常念
八定不失神足修已神通分別三世知去來
今復當思惟學佛深藏無邊際慧亦當學習
具諸佛法覺了諸法而無染著學演無底開
七寶藏學以神智成其刹土學習光明普照
十方得佛定意感動國土學權方便化諸外
道學於禁戒成就道果學當集會而轉法輪
已身所學成一切智已成所學而無所學佛
告最勝是謂菩薩修十住行進成作佛嚴治
國土降神兜術權化天人示現殊異奇勝之
法觀察種姓託生何國從兜術天來下世間
三十六返周旋往來而化天人於中度脫無
數衆生以權方便獨步三界而無恐懼最後

下降六年苦行專心苦體枯木不別吾雖示
現在此苦行然我乃在無號佛土於彼教化
八十四億那術天人皆使建立不退轉地此
土衆生見我形者謂爲命過不成命根行過
衆生積薪焚燒不能使然善權一心轉進聖
慧不捨衆生諸所好慕除諸不要哀愍不及
是故菩薩現于苦行十住菩薩於十地中開
化衆生不別生死所度人民與成佛等若使
菩薩意欲速成無上道者如彈指頃身黃金
色具足十力四無所畏十八不共殊勝之法
菩薩眷屬一日成就第十四不求國土種類好惡但
以衆生心懷貢高輕彼尊已不捨自大是以
菩薩現受胞胎隨世權化在所至到多所饒
益十住菩薩無菩薩號即當稱之號曰如來
至真等正覺明行成爲善逝世間解無上士

道法御天人師號佛世尊無量福會諸佛所
護諸天宿衛所講說法要有緣本隨時應適
終不唐舉最勝當知所以名曰無號佛土者
去此東南七十七億江河沙等諸佛國土彼
有世界名曰仁賢佛名善眼彼無聲聞緣覺
之道以無名號無生滅法而相教授知解脫
空不計解脫聞空即解通利無難亦無三毒
婬怒癡病總持強記亦不可盡吾於彼土施
爲佛事此彼衆生亦不知吾身爲所在是謂
菩薩多所潤及是謂最勝十住菩薩於十地
中而淨其行

十住斷結經卷第五